

Uossa as poja eir pes-char aint il BES

■ (anr/mfo) Per surmuntar la crisa da finanzas e spordscher ün'attracziun eir d'ürant la stagiun morta, driva il Bogn Engiadina Scuol (BES) ün batschigl da forellas. A partir da subit as poja là ir a pes-char. «Eu sun svesc ün pes-chader ambiziunà e sa cun che brama cha mincha pes-chader spetta a gnir ils prüms mai», declera Philipp Gunzinger, il directur dal BES. Cha perquai hajal orga-

nisà il novum dal BES: Aint il batschigl dad aua fraida chi's rechatta aint il BES vegnan missas oura bellas forellas chi pon in seguit gnir pes-chadas oura. «Da pudair pes-char ün mais avant l'avertüra da la pes-cha es bain alch bel», declera l' e s'allegra da pudair bivgnantar in quell'ocasiun a blers amatuors dal sport da pes-char.

> PAGINA 9



A partir dals prüms avrigl s'inscuntrarà eir a pes-chaders aint il Bogn Engiadina Scuol. Quia as vezza il directur dal BES, Philipp Gunzinger, chi fa avant sco cha quai funcziuna. MAD



Quist giast ha plashair dal Bogn Engiadina Scuol chi'd es uossa eir ün'oasa per pes-chaders. MAD

Ir a pes-char aint il Bogn Engiadina Scuol

Offerta speciala eir per na pes-chaders

DA MARTINA FONTANA / ANR

■ **Ilis cours dal pes-chaders battaran plü e cun leger quista novità: Quist on pon els ir a pes-char ün mais avant l'avertüra da la pes-cha uffiziala. Per esser attractiv eir d'ürant la stagiun morta ha il Bogn Engiadina Scuol impli il batschigl d'aua fraida cun üna massa da forellas.** «Eu sun svesc pes-chader paschiunà e spet minch'on cun brama e malpazienza da pudair cumanzar meis hobi», declera Philipp Gunzinger, il directur dal Bogn Engiadina Scuol (BES). Forsa eir grazcha a sia paschiun ha'l elavurà üna nova sporta: A partir dals prüms avrigl as preschantarà il bogn eir sco oasa per pes-chaders. Il batschigl da l'aua fraida vain funcziunà in-

tuorn ad ün lö chi fa glüscher ils ögls a mincha pes-chadra e pes-chader: «Nus implin il batschigl cun bellas forellas da masüra e tillas laschain pes-char oura a quella gliעד chi ha interess», declera l'. Cha las reglas da pes-char chantunalas valan eir pro els – però patenta da pes-char nu's stopcha muossar ingüna. «Eir mammas cun uffants, bazegnars e nonas ans sun fich bainvis», agiundscha'l. Causa chi nu gnia pretaisa ingüna patenta da pes-char possan però eir gnir giasts e persunas da l'ester a far adöver da la nova sporta.

Pes-char sco a la riva da l'En

Pes-chaders e pes-chadras chi vöglian trar a nüz la nova sporta dal BES pon far quai precis i'l listess möd sco cur chi

van a pes-char a la riva da l'En o dals lais. Per pes-chaders nu vala la regla da stuvair trar oura las s-charpas o ils stivals per entrar i'l bogn. Els pon gnir in plaina mandura da pes-char e cleramaing eir tour cun sai plüssas perchas. Üna pitschna contribuziun vi dals cuosts ston els però pajar: «Persunas chi vegnan a pes-char pajan 15 francs pro la chascha dal bogn», precischa Gunzinger. Pes-char pon els maximalmaing ses peschs al di. D'ürant il di da l'avertüra da la nova sporta vain ultra da quai amo offri ün aperitiv.

Las portas dal Bogn Engiadina Scuol sun avertas per pes-chadras e pes-chaders davent dals prüms avrigl a partir da las 10.00. L'acziun «Pes-char aint il Bogn Engiadina Scuol» düra fin als 30 avrigl d'ürant ils uraris da l'avertüra dal bogn.